

**Apeqquteqaat aallaavigalugu oqallinnissamik siunnersuut, qanoq ililluta qulakkeersinnaaneripput, maani nunami takornariat amerligaluttuinnarnerisa nalingata siuariartormik suliffissanillu amerlanerusunik pilersitsinermik innuttaasunut iluaqutaasinnaasumik** (Inatsisartunut ilaasortaq Jørgen Rosbach, Demokraatit)

### **Akissuteqaat**

(Nunanut allanut, Inuussutissarsiornermut, Aatsitassanullu Naalakkersuisoq)

Siunnersuuteqartup pingaarutilimmik, maannalu pisumik qaqitsineranut qujanaq.

Kalaallit Nunaanni inuussutissarsiutini ineriartupiloortuni ullumikkut takornariaqarneq ilaavoq, aningaasaqarnitsinnullu aamma suliffeqarnitsinnut sulii sunniuteqarluarluni.

Visit Greenlandip takornariartitsinermut naatsorsuutit pisortatigoortut tunngaviaglugit 2025-mi takornariaqarneq 3,6 mia. koruuninik kaaviiartitsivoq. Kaaviiartitanit 58 pct.-it nunanit allanit takonarissaneerput, 42 pct.-illu nunatsinnit takonarissaneerlutik. Takornariaqarnerup tamakkiisumik naleqarnerulersitsinermut toqqaannartumik tapersiissutaa 1,5 mia. koruuninik sinneqarpoq, assigiinnarpaa tunisat ataatsimut nalingisa 4,9 pct.-iat.

Ilutigisaanik takornariaqarneq nunami tamarmi suliffinnik pilersitsivoq. Takornariaqarneq inunnik 2.122-nik suliffissaqartitsisoq nalilerneqarpoq, assigiinnarpaa suliffeqarnerup tamarmiusup 7 pct.-it missaat. Taassuma saniatigut akileraarutitigut isertitat, ataatsimut atugarissaarnissatta aningaasalersorneranut tapertaasut amerlapput.

Takornariaqarnermi siuariartorneq aamma inuiaqatigiinnut iluaqutaanissaanik qulakkeerisunik, Naalakkersuisut ukiuni kingullerni annertuunik suliniuteqarput. Taamaalilluni Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit Nalunaarut 2025-mi 29 mio. koruuninik tapersiivoq. Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutinit isertitat umiarsualivinni attaveqaasersuutit ineriartortinneqarnerinut, aserfallatsaaliorneqarnerinullu atorineqartarput, avatangiisinullu aamma aserfallatsaaliuinnermut akiliutit kommuninut attuumassuteqartunut tuttarlutik.

Taassuma saniatigut Unnuinnermi akitsuut pillugu Inatsisartut inatsisaat 2026-mi januaarip aallaqqaataani atuutilerpoq. Taamaalilluni takornariaqarnerup inuiaqatigiit aningaasaqarnerinut tapersiinerunissaanut aaqqiineq taanna tapersiivoq.

Takornariartitsinermik inuussutissarsiorfiit ilaanni piginnaasat sulii killeqarmata Naalakkersuisut ilutigisaanik eqqumaffigaat. Pingaartumik unnuisaqarfeqarnerup, assartuussinerullu iluini

ineriartortitseqqinnissaq pisariaqartinneqarpoq. Tamanna pillugu takornarissat amerlassusaannaat pinnagu pinngortitamut, attaveqaasersuutitut, najukkamilu inuiaqatigiinnut sunniutaat eqqarsaatigalugit takornariaqarnerup kaaviiartitsineq, tamakkiisumik naleqarnerulersitsineq, suliffeqarneq, akileraarutigullu isertitat aaqqutigalugit ilanngaattissat ilanngaatigereerlugit najukkami nalinga tamarmiusoq pilersitaasa pissallugu pingaaruteqarpoq.

Tamanna tunuliaqutaralugu Visit Greenlandip takornariartitsinermik inuussutissarsiorfiit suleqatigalugit niuerfik, tikeraallu pissusii misissuiffiqeqqissaarnikuuai. Pissutsini najukkami naleqarnerulersitsinerpaani tunisassianik ineriartortitsinissamut, pilerisaarinissamullu angusat siunnerfilimmik atorneqarput.

Takornariartitsinermut immikkoortumi pilersaarut 2035-p tungaanut atuuttussaq 2025-p aallartinnerani Naalakkersuisut akuersissutigaat. Qitiusumik suliniutissani sisamani agguataarsimasunik pilersaarut 70-it missarluinnaaniittunik suliniuteqarpoq: killiliussanik pitsaanerusunik pilersitsineq, tikisitsisartut pitsaanerusut, piginnaasanik ineriartortitsineruneq, piujuannartitsinissallu ataavartumik ukkatarineqarnera. Takornariaqarnerup ukiuni tulluittuni ineriartortinneqarnissanut, immikkoortumut pilersaarut Naalakkersuisut periusissioinnikkut sinaakkutissaraat.

Takornariaqarneq pitsaasumik siuariartortoq tapersersorneqassasoq, akisussaassuseqartumillu aqunneqassasoq siunnersuuteqartoq isumaqatigaara. Isertitat amerliartuinnartut inuiaqatigiinnut tamanut iluaqutaanissaat qulakkiissavarput. Ilutigisaanik inuussutissarsiutit ineriartortitsinissamut periarfissaat illersussavagut, killilersuutillu siuariartornermut, aningaasaliinernut, suliffinnillu pilersitsinissamut akimmiffiusinnaasut pinngitsoortissallutigit.

Iluarsiissuteqartoqassappat massakut malittarisassiuussinermi, takornariartitsinermullu immikkoortumi pilersaarummi suliniutini ingerlasuni misilittakkat utaqqineqartariaqarmata, inatsimmut allannguutissanik allanik massakut siunnersuuteqartoqassanngikkaluarpoq.

Tamanna pillugu takornariaqarnerup Kalaallit Nunaannut iluaqutaasumik piujuartussamik sulii ineriartornissaa peqatigiilluta qanoq qulakkeersinnaaneripput pillugu oqallilluarnissaq Naalakkersuisut qilanaaraat.

Taamatut oqaaseqarlunga Inatsisartut sammisamik eqqartuinissaat Naalakkersuisut qilanaaraat.